



Prishtinë: 10.05.2017

Kodi i ZRRE-së: V_921_2017

Bordi i Zyrës së Rregullatorit për Energji

Duke u bazuar në:

- Nenin 9, paragrafi 1, nën-paragrafi 1.7, nenin 15 dhe 17 të Ligjit për Rregullatorin e Energjisë (Nr. 05/L-084);
- Nenin 17 dhe 18 të Rregullës për Zgjidhjen e Ankesave dhe Kontesteve në Sektorin e Energjisë;
- Vendimi i DMK-së të ZRRE-së: **ZRRE/DMK_V_1560_03_17**;
- Ankesa e KESCO-së e datës **25.04.2017**.

në seancën e mbajtur më datë 10.05.2017, nxori këtë:

V E N D I M

- I **REFUZOHET** ankesa e KESCO-së ndaj vendimit të DMK-së për konsumatorin B. M. nga fshati Hajvali, Komuna e Prishtinës, me shifër të konsumatorit **DPR – 90068000** si e pa bazuar.
- II **MBETET në fuqi** vendimi i Departamentit për Mbrojtjen e Konsumatorëve nr. ZRRE/DMK_V_1560_03_17 i datës 21.03.2017.

A r s y e t i m

Zyra e Rregullatorit për Energji me datë 25.04.2017 ka pranuar ankesën e parashtruar nga përfaqësuesi i autorizuar i KESCO-së, i cili ka kundërshtuar vendimin e Departamentit për Mbrojtjen e Konsumatorëve në ZRRE si vendim i shkallës së parë për këto shkaqe: Përfaqësuesi i KESCO-së, në ankesë ka theksuar se korrigjimi i datës 04.06.2015 është në përputhshmëri të plotë me rregullat në fuqi, pasi që energjia e harxhuar nga konsumatori nuk është regjistruar e tëra në njehsorin elektrik, por vetëm 33.33% e saj si pasojë e djegies së dy nga 3 sistemet matëse, atëherë pjesa e mbetur e energjisë së harxhuar por e paregjistruar ne njehsor elektrik prej (66.66%) përmirësohet përmes korrigjimit të faturave për 6 muajt e fundit bazuar në Kodin e matjes së OSSH-së neni 4.11.1. Në ankesë theksohet se pasaktësia ne matje nuk është trajtuar si shfrytëzim i paautorizuar nga KESCO. KESCO gjithashtu thekson se ZRRE vendimin e saj e mbështet në rrjedhën e energjisë elektrike aktive me njehsorin e ri me këtë theksohet se një gjë e tillë është e mundur por që nuk është relevante për faktin se konsumatori ka mundësi të ndërrimit apo zëvendësimit te pajisjeve matëse shtëpiake e cila do të ndikonte në zvogëlimin e shpenzimit të energjisë elektrike, po ashtu është edhe një tendencë e konsumatorëve se me ndërrimin e njehsorëve nga analog në njehsor digjital, konsumi i energjisë është me i vogël.

Bazuar ne këtë KESCO kërkon nga Bordi që të pezulloi vendimin e DMK/ZRRE _V_1560_03_17, në lidhje me shifrën DPR 90068000 si të pabazuar.



Bordi i Zyrës së Rregullatorit për Energji në mbledhjen e mbajtur me datë 10.05.2017 ka analizuar të gjitha shkresat e lëndës të prezantuar nga palët në kontest si dhe vendimin e Departamentit për Mbrojtjen e Konsumatorëve dhe pas kësaj ka vërtetuar se vendimi i DMK-së si vendim i shkallës së parë është vendim i drejt dhe i bazuar në prova konkrete.

Lidhur me pretendimet e përfaqësuesit të KESCO-së, se korrigjimi i datës 04.06.2015 është në përputhshmëri me dispozita ligjore të përcaktuara me nenin 4.11.1 të Kodit të Matjes së OSSH-së, për Bordin pretendimet të tilla janë vlerësuar si të paqëndrueshme për faktin se nga analiza e bërë rrjedhës së energjisë elektrike konsumatori përkundër kësaj ka rënie të shpenzimit të energjisë elektrike në raport me atë që pretendon përfaqësuesi i KESCO-së në ankesën e tij.

Nga të dhënat e analizuar nga rrjedha e energjisë elektrike me njehsorin e vjetër elektrik si dhe njehsorin e ri elektrik konstatohet se konsumatori ka lexim dhe faturim të rregullt të shpenzimeve mujore, por që është vërtetuar se ka mos përputhje të mëdha të shpenzimeve përkatësisht me njehsorin e vjetër **nr. 60351848** të cilat shpenzime janë shumë të larta prej 56% më shumë se me njehsor të ri. Sipas rrjedhës së energjisë elektrike mesatarja e shpenzimeve me njehsorin elektrik **nr. 60351848** për periudhën 09/2014 deri në periudhën 02/2015 është **1,027 kWh/muaj**, kurse me njehsorin e ri elektrik **nr. 16077212** periudha 09/2015 deri në periudhën 02/2016 është **657 kWh/muaj**, e që krahasuar shpenzimin e njehsorit **nr. 60351848** me njehsorin **nr. 16077212** paraqet zbritje prej **56%**.

Bordi ka analizuar edhe krahasimet e bëra nga Departamenti për Mbrojtjen e Konsumatorëve të cilat përfshijnë periudhën nga fillimi i regjistrimit të shpenzimeve me njehsorin elektrik **nr. 60351848**, ku konstatohet se mesatarja mujore nga periudha 04/2011 deri në periudhën 03/2015 është **802 kWh/muaj**, kurse me njehsorin e ri elektrik nr.16077212 nga periudha 03/2015 deri në periudhën 12/2016 është **384 kWh/muaj**, e që kjo paraqet rënie prej **108%** në konsumin e energjisë elektrike. Andaj mbështetur në të gjitha këto analiza të cilat përfshijnë periudhën e shpenzimeve mujore me njehsorin e vjetër dhe të ri, Bordi i ZRRE-së nuk ka gjetur asnjë element me të cilin mund të konstatohet se njehsori elektrik **nr. 60351848** nuk ka bërë matje të saktë për periudhat të cilat ngarkohet me korrigjim prej 66% pasi që kjo nuk reflekton gjendjen reale të konsumit të konsumatorit.

Sipas nenit 5 paragrafi 1 nën paragrafi 1.5 të Rregullës për kushtet e përgjithshme të furnizimit me energji theksohet: *“konsumatorët kanë obligimin që të paguajnë për energjinë e shfrytëzuar, sipas kontratës për Furnizim me Energji të lidhur me Furnizuesin e Energjisë, si dhe për tarifën për shfrytëzim të sistemit të miratuara nga ZRRE-ja”*. Bazuar në këtë dispozitë ligjore është konstatuar se në rastin konkret konsumatori ka obligim që të paguaj për atë që ka shpenzuar, por që jo të ngarkohet pa bazë për rastet që kanë probleme teknike në njehsorin elektrik.

Bordi i ZRRE gjithashtu ka konstatuar se përfaqësuesi i autorizuar i KESCO-së në ankesën e tij nuk ka ofruar asnjë provë bindëse për të vërtetuar faktin se vendimi i DMK-së si organ i shkallës së parë nuk është vendim i drejt dhe i bazuar në ligje dhe rregulla, por që i njëjti në ankesë vetëm se ka kontestuar vendimin e shkallës së parë në mënyrë të përgjithësuar pa ofruar prova të arsyeshme.

Bordi i ZRRE-së në mbledhjen e mbajtur me datë 10.05.2017 pas analizimit të krejt asaj që u theksua më lartë, ka vendosur si në dispozitivin e këtij vendimi.

III. Vendimi nxirret në gjuhët zyrtare në Republikën e Kosovës.

IV. Vendimi hyn në fuqi në datën e miratimit nga Bordi i ZRRE-së, dhe do të publikohet në faqen elektronike zyrtare të ZRRE-së.



Këshillë Juridike: Pala e pakënaqur me këtë Vendim mund të iniciojë konflikt administrativ në Gjykatën Kompetente, brenda tridhjetë (30) ditëve nga data e pranimit të Vendimit ose data e publikimit të tij në faqen elektronike të ZRRE-së, cilado që ndodhë e fundit.

Bordi i ZRRE-së:

Krenar Bujupi, u.d. kryesues

Arsim Janova, anëtar

Besim Sejfiqaj, anëtar

Vendimi iu dërgohet:

- KESCO-së, dhe
- Konsumatorit B. M.i dhe,
- Arkivit të ZRRE-së.